
Акафист преподобномученику Корнилию Псково-Печерскому



Кондак 1

Избранный чудотворче, преславный угодниче Христов, скорый помощниче и теплый молитвенниче о всех, с верою и любовию просящих твоего заступления, восхваляем тя любовию, Корнилие преподобномучениче, ты же яко имеяй дерзновение ко Господу, моли о спасении нас, поющих ти:

Радуйся, Корнилие преподобномучениче, отче наш.

Икос 1

Ангелов подражатель явился еси, преподобномучениче и богоносне отче наш Корнилие, ангельски поживый на земли и нам оставивый образ совершенства духовнаго. Сего ради прослави тя чудесы Христос Бог, Емуже предстоиши ныне во свете невечернем Царствия Небеснаго; от нас же, чтущих тя, слышиши пение таковое:

Радуйся, яко любве ради ко Господу всякое наслаждение земное оставил еси;

Радуйся, яко благая мира сего презрел еси.

Радуйся, яко богатство нетленное обрел еси;

Радуйся, яко иго Христово благое и удобоносимое возлюбил еси.

Радуйся, яко во плоти аки безплотен пожил еси;

Радуйся, яко боголюбезную чистоту непорочно сохранил еси.

Радуйся, яко узкими враты в Царствие Небесное вошел еси;

Радуйся, яко равноангельскую честь достойно приял еси.

Радуйся, яко венец неувядаемый от Господа приял еси;

Радуйся, яко на небеси и на земли прославлен еси.

Радуйся, Корнилие преподобномучениче, отче наш.

Кондак 2

Видя суету жития мирскаго и слыша глас Пастыря Христа: «Иже аще хощет по Мне идти, да отвержется себе и возмет крест свой», и ты, преподобномучениче, мир и вся благая его оставил еси, да Единому Богу поживеши, поя Ему: Аллилуиа.

Икос 2

Разумом свыше просвещенный, наставил еси духовная чада твоя ко благоугождению истинному и любезно приял еси вся возжелавшия подвизатися купно с тобою во спасение, отче Корнилие, спасительнаго пути наставниче предобрый; приими убо и нас под твой отчий покров и молитвами твоими помози нам спасение вечное унаследовати, да тя восхвалим сице:

Радуйся, алчущим и жаждущим правды глаголов живота вечнаго возвестителю;

Радуйся, ищущим Царствия Божия пути спасительнаго указателю.

Радуйся, взыскующих горняго Царствия мудрый водителю;

Радуйся, обуреваемых страстьми добрый кормчий.

Радуйся, во благочестии труждающихся великий помощниче;

Радуйся, немудрых благоискусный учителю.

Радуйся, теплый о всем мире предстателю;

Радуйся, усердный и благоприятный о душах наших ходатаю.

Радуйся, надежный корабль в житейском плавании обретший;

Радуйся, и нам тихую пристань указавый.

Радуйся, Корнилие преподобномучениче, отче наш.

Кондак 3

Силою Господа умудренный ко благоустроению святыя обители оградити ю от нашествия вражия стеною, паче же святыми молитвами твоими препоручивый ю честному покрову Пресвятыя Богородицы, умоли дати и нам покров и защиту, да сподобимся купно с тобою пети Богу: Аллилуиа.

Икос 3

Имуще тя, отче Корнилие, скораго в бедах помощника, благовернии людие, в напастех и скорбех тя на помощь молитвенно призывающе и дары благости Божия молитвами твоими от Щедродавца Бога обильно приемлюще, тебе от любве теплыя хвалебно воспевают:

Радуйся, многажды прощения наша исполнением предваривый;

Радуйся, болящим врачу благоискусный.

Радуйся, скорбящим благоприятное утешение;

Радуйся, унывающим благодатное укрепление.

Радуйся, душетленных страстей прогонителю;

Радуйся, безпомощным скоропредстательный помощниче.

Радуйся, иноков богомудрый руководителю;

Радуйся, радость истинную во Христе нам показавый.

Радуйся, воеводо изрядный духовных воинов;

Радуйся, Корнилие преподобномучениче, отче наш.

Кондак 4

Бурею страстей и треволненьми во многомятежном мире непоколебимый в тихое пристанище спасения душу твою управил еси, вся благая и красная мира презрев, призывая и всех быти причастницы горняго Царствия, идеже ныне пребываеши, поя Богу: Аллилуиа.

Икос 4

Слышавше пастырие Христовы Церкве о твоих подвизех и яко земнаго тя Ангела помышляя, избраша тя во игумена обители, достойную почесть трудом твоим воздавше и тем подвизающе нас благохвалити тя сице:

Радуйся, Агнца и Пастыря верный служителю;

Радуйся, алтаря Господня достойный предстоятелю.

Радуйся, богомудрый иноков начальниче;

Радуйся, истиннаго смирения наставниче.

Радуйся, совершеннаго терпения подвижниче;

Радуйся, даров Святаго Духа честное вместилище.

Радуйся, слезнаго умиления преисполненный;

Радуйся, Пресвятыя Троицы сосуде избранный.

Радуйся, благочестия утверждение;

Радуйся, православия столпе и похвало.

Радуйся, Корнилие преподобномучениче, отче наш.

Кондак 5

Боготечную мысль соломонову имея, образ Успения Пресвятыя Богородицы написа благочестивый Алексий, последи же ради молитв преподобнаго Корнилия неизреченные чудеса икона являти начаше: исцеляше бесных, отверзаше очи слепым многим, о сем радующеся, иноцы пояху Богу: Аллилуиа.

Икос 5

Созда преподобный Корнилий во игуменство свое над Святыми вратами храм Святителю Николаю Чудотворцу, аки защитнику всех обидимых и ревнителю православия, уповая быти ему хранителю обители от врагов православия; темже и ныне с ним предстоя Престолу Господа Славы, помолися, отче Корнилие, Творцу о спасении всех потрудившихся ради святыя обители и о всех славящих тя пеньми сицевыми:

Радуйся, правило веры и благочестия;

Радуйся, образе целомудрия и воздержания.

Радуйся, постническаго лика украшение;

Радуйся, звездо, сияющая в сонме преподобных.

Радуйся, иноков пастырю и учителю;

Радуйся, и в мире живущих заступниче и покровителю.

Радуйся, тесный и прискорбный путь паче пространнаго возлюбивый;

Радуйся, учителю мужественнаго подвижничества.

Радуйся, стено, невидимо ограждающая паче стен каменных;

Радуйся, жертва вечерняя Богу приятная.

Радуйся, Корнилие преподобномучениче, отче наш.

Кондак 6

Проповедуя слово Божие братии твоей, всех поучал еси словом и житием безмолвию, смирению, посту и молитве, в нейже деннонощно пребывая, воспевал еси выну Всесильному Богу: Аллилуиа.

Икос 6

Возсиял еси светильник веры, отче Корнилие, обители твоей такожде и окрестным людем, землю же Ливонскую верою христианскою просветил еси, невидимый храм Духа Божия в себе нося, устроил еси видимый храм Пречистыя Богородицы Одигитрии и новопросвещенней чуди храмы основал еси, такожде и клирики устроил еси, да вси обрящут врачевание недуг своих душевных. Сего ради прославлен еси от Подвигоположника Христа, от нас же приемлеши сия похвальныя песни:

Радуйся, Евангелия Христова благовестителю;

Радуйся, веры православныя проповедниче.

Радуйся, благодатию Божиею насыщенный;

Радуйся, от источника Божественнаго напоенный.

Радуйся, потоком слез спасительных орошенный;

Радуйся, в ризу спасения облеченный.

Радуйся, одеждою нетления одеянный;

Радуйся, брашно неисчерпаемое указавый.

Радуйся, питие приснотекущее Христа проповедавый;

Радуйся, манной слова Божия люди питавый.

Радуйся, Корнилие преподобномучениче, отче наш.

Кондак 7

Агнцу Божию, вземшему грехи мира, подражая, кротость и смирение Его себе усвоил еси, отче Корнилие, и веяния скорби и обиды безропотно претерпел еси, поя Богу: Аллилуиа.

Икос 7

Дивныя и доблестныя подвиги твоя восхваляюще, добропобедне воине Христов Корнилие, ублажаем тя, от тленнаго сего жития земным царем к Небесному Царю в вечное жилище предпосланнаго, славим мученическую кончину твою и молитвенно празднуем святую память твою, тебе усердно воспевающе:

Радуйся, яко невинною кровию твоею чистое житие запечатлел еси;

Радуйся, яко в час смертный к лику Мучеников причислен еси.

Радуйся, яко отверзошася ти врата райская, да внидеши в радость Господа твоего;

Радуйся, яко душу твою Жизнодавец Христос в селения небесныя приял еси.

Радуйся, яко мощи твоя на земли прославишася;

Радуйся, яко со безплотными силами трисвятую песнь Богу немолчно воспеваеши.

Радуйся, яко с Пророки и Апостолы светло торжествуеши;

Радуйся, со святыми Мученики купно увенчанный.

Радуйся, с Преподобными и праведниками прославленный;

Радуйся, Корнилие преподобномучениче, отче наш.

Кондак 8

Странника и пришельца в мире сем себе помышляя и горняго Иерусалима взыскуя, течение временныя жизни во святей обители Божия Матере скончал еси, Ейже и ныне предстоиши о сем моляся, да вси купно с тобою поют Богу: Аллилуиа.

Икос 8

Победив вся враги оружием правды Божия, яко истинный воин Христов увенчен венцем победным в Царстве славы, идеже пребывая с преподобными Марком и Ионою, и ныне ограждаеши от врагов обитель твою, призывая и нас подражати ти в духовней брани, да и мы в радости духовней вопием ти:

Радуйся, смирением святым гордыню в себе победивый;

Радуйся, кротостию совершенною ярости пламень угасивый.

Радуйся, молитвами усердными уныние духа прогнавый;

Радуйся, радования о Господе достигнувый.

Радуйся, воздержанием и целомудрием чистоту души и тела соблюдший;

Радуйся, неленостно всяку добродетель в себе возрастивый.

Радуйся, венец победный от Христа приявый;

Радуйся, от Господа даром чудес обогащенный.

Радуйся, в лик добропобедных Мученик приятый;

Радуйся, аки добрый воин к воином небесным сопричтенный.

Радуйся, Корнилие преподобномучениче, отче наш.

Кондак 9

Всякое наслаждение плотское возненавидев, Корнилие преблаженне, единаго Бога всем сердцем возлюбил еси яко источника всякия благости, темже и Господь тя возлюби и обильно щедроты Своя на тя и обитель твою излия, да вси к мощем твоим прибегающии и скорую помощь от тебе приемлющи благодарственно вопиют: Аллилуиа.

Икос 9

Витии многовещаннии не довлеют глаголати вся подвиги твоя, богомудре отче Корнилие, ибо доброта жития твоего воистину превосходит похвалу человеческую, обаче мы любовию к тебе побуждаеми, дерзаем смиренно хвалити тя пением таковым:

Радуйся, святыя Церкве светильниче немеркнущий;

Радуйся, всемощным заступлением твоим от меча иноплеменных нас избавляющий.

Радуйся, страны нашея благодатное украшение;

Радуйся, града нашего покрове благодатный.

Радуйся, обители твоея утверждение и похвало;

Радуйся, монашествующих пречудная красото.

Радуйся, роду христианскому присное утешение;

Радуйся, любящих и чтущих тя пред Богом ходатаю.

Радуйся, грешником ко спасению пути указателю;

Радуйся, пред Престолом Божиим миру грешному предстателю.

Радуйся, Корнилие преподобномучениче, отче наш.

Кондак 10

Спасти хотя град Псков и люди православныя от нашествия иноплеменных, явился еси старцу Дорофею купно с Антонием Киевским, сопутствующе Пресвятей Богородице, поспешившей на помощь людем Своим; егда же Богоматерь укоряюще люди за скверну жития их, умолял еси со слезами, глаголюще: «О Госпоже Владычице Богородице, согрешиша живуще беззаконно, но не остави их заступлением Твоим, паче же молися Сыну Твоему за люди недостойныя», — и тако отвратил еси праведный гнев, да зовут во умилении Богу: Аллилуиа.

Икос 10

Стену заступления и молитвенника богоприятна имуще тя, отче Корнилие, благодарение Отцу Небесному усердно возсылая за вся благодеяния Его, тобою нам обильно являемыя, тебе же, предстателю нашему, сицевое приносим пение:

Радуйся, предивный угодниче Господень;

Радуйся, неутомимый в подвизех избранниче Христов.

Радуйся, слуго добропослушливый Всевышняго Владыки;

Радуйся, благий и верный рабе Царя царствующих.

Радуйся, обидимых добрый заступниче;

Радуйся, странных благонадежное пристанище.

Радуйся, недугов душевных и телесных благий целителю;

Радуйся, грешников пред Богом ходатаю.

Радуйся, кающихся со Христом примирителю;

Радуйся, небесный наш покровителю.

Радуйся, Корнилие преподобномучениче, отче наш.

Кондак 11

Пение всякое не довлеет ко прославлению величествия твоего, отче преподобне, твоими бо молитвами дивно явися сила Божия: молился бо еси пред пречистым образом Владычицы и тем обитель от разорения сохранил еси. Ныне и мы молим тя, не тщу сотвори надежду нашу и избави нас от враг наших, да во умилении зовем Спасителю Богу: Аллилуиа.

Икос 11

Светильник добрых дел был еси при жизни, отче преподобне, и светильник Божия благодати явился еси по смерти, сияя чудесы и исцеления источая; и по ста двудесяти летех, аки сокровище драгоценное, мощи твоя из недр земных явлены быша, да тебе от Господа прославленному умильно взываем:

Радуйся, нетления цвете прекрасный;

Радуйся, крине рая небеснаго процветший.

Радуйся, светлостию твоею мрак душ наших озаряяй;

Радуйся, от болезней многоразличных благодатно исцеляяй.

Радуйся, ран греховных врачу благоискусный;

Радуйся, сердец скорбящих утешителю.

Радуйся, обители твоея страже неусыпный;

Радуйся, спящих во гресех возбудителю.

Радуйся, бдящих в молитве укрепителю;

Радуйся, Корнилие преподобномучениче, отче наш.

Кондак 12

Благодать от Господа приял еси, преподобномучениче, ко просвещению иноков и мирских

людей светом истинныя веры, темже и ученицы твои, в земном житии тобою просвещеннии, ныне с тобою на небеси прославляют Вседержителя Светодавца и нас научают славословию, да и мы Творцу и святых Святейшему Слову поем: Аллилуиа.

Икос 12

Поюще дивныя твоя чудеса, умиленно припадаем пред пречистыми мощами твоими, преподобне отче наш, благодарственно воспоминаем труды твоя и твое заступление, и якоже древле услышал еси мольбы рабов твоих, такожде и ныне услыши скорбныя молитвы чтущих тя и сподоби ныне прияти скорое свобождение от врагов спасения нашего, да невозбранно поем тебе песнь сию:

Радуйся, всесильными молитвами твоими от врагов видимых и невидимых избавляяй;

Радуйся, светом истины сущих во тьме и сени смертней озаряяй.

Радуйся, разслабленных утверждение и сило;

Радуйся, неверных прославляти Бога научаяй.

Радуйся, нераскаянных грешников к покаянию обращаяй;

Радуйся, помощь сирым и вдовицам подаваяй.

Радуйся, скорбных утешаяй;

Радуйся, в посте и молитвах ослабевающих укрепляяй.

Радуйся, Корнилие преподобномучениче, отче наш.

Кондак 13

О преподобномучениче отче Корнилие, тебе молимся и тебе просим, вонми похвальному пению сему, тебе от усердия нашего приносимому, не остави нас святыми твоими молитвами, не престани просити премногих грехов наших прощения, да в смертный час сподобимся прияти кончину жизни мирну и внити в Царствие Небесное, да и мы тамо с тобою прославим безмерное милосердие Божие, воспевающе Владыке живота: Аллилуиа.

(Этот кондак читается трижды, затем икос 1 и кондак 1)

Молитва преподобномученику Корнилию Псково-Печерскому

О святый преподобномучениче Корнилие! Смиренно припадаем к раце мощей твоих и умильно молим тя: милостиво призри на скорби наша душевныя и телесныя и избаву нам подаждь; помози нам, святче Божий, от навета злых человек, от нихже и сам ты невинно на земли пострадал еси. Защити нас от насилия диавола, страстно воюющаго в немощных удесех наших, умоли Господа Бога и Пречистую Его Матерь даровати нам тихое и безгрешное житие, взаимную братскую нелицемерную любовь и мирную христианскую кончину, да чистою совестию предстанем нелицемерному Страшному Судилищу Христову, и в Царствии Его прославим Животворящую Троицу, Отца и Сына и Святаго Духа, во веки веков. Аминь.